

**Akiliisitsiniartarnermut oqartussaaffiup kommuninut tunniunneqarpat qanoq iluaqutaa-sinnaanersoq pillugu Inatsisartunut apeqquteqaat aallaavigalugu oqallisissiaq.**

**Akissuteqaat**

(Aningaasaqarnermut Naalakkersuisoq)

Siunnersuuteqartup nunatsinni ajornartorsiutaasoq oqaasertalersorpaa, tassalu innuttaasut amerlavallaat aningaasaqarnikkut inissisimaffitsik nakkutiginninnerat akiligassamik kullu akiliisannginnerat. Tamanna aningaasaqarnikkut kisiat unammillernartortaqaangilaq, aammattaarli inunnik isumaginninnerup tungaatigut.

Naatsumik killiffik nassuiaatigissagaanni 2020-mi januaarimi akiliisitsiniartarnermi suliat katillugit 223.000-iupput akiligassanit akilinningsuukkat katillugit 863 mio. kr.-ullutik. Ukiup siulianut sanilliullugu akiitsut 13%-imik appariaateqarlutik aammalu suliat amerlassusaat 28%-imik appariarlutik. Tamatumunnga peqqutaavoq innuttaasut ilaat akiliisinnaassuseqaangitsut akiitsuisa suli annerpaartaat ukiut tallimat qaangiunneranni pisoqalisootarmata. Akileraartarnermut Aqutsisoqarfiup akiitsunik annikillisaanermut aaqqissuussaani assigiiaartumi siunertarinearpoq innuttaasut akiligassaqarfimmittit piunasaqaataasunut akiliisinnaassuseqaqqilernissaminnut periarfisinneqarnissaat.

Siunnersuuteqartup kissaatigaa akiliisitsiniartarnermut oqartussaaffiup siammarterneqarnissaa, taamasilluni suliasap kommuninut uterteqqinneqarluni.

Naalakkersuisut akiliisitsiniartarnermut oqartussaaffiup kommuninut tunniunneqaqqissappat arlalitsigut ajoqutissartaqartutut nalilerpaat.

Siullertut suliasap tigusnaanut innuttaasunut qanilaarnissaq kisimi piunasaqaataanngilaq. Suliasaqarfikkut inatsitigullu suliasamut piginnaasaqarnissaq aamma atorfissaqartinneqarpoq. Piginnaanngorsaaneq sulisullu tigungmiinnarnissaat nuna tamakkerlugu allaat ajornartorsiutaavoq. Unammillernartooq tamanna annikinnerulernaviannngilaq kommunit tallimat namminerisamik allaffissornikkut immikkoortortaqarfiliortitsissappata. Akiliisitsiniartarnerup pitsaasuunissaa qulakkeerneqassappat suliatigullu illersorneqarsinnaassappat, taava atorfissaqartinneqarpoq suliamut tungasumut avatangiisimik paarlaassueqatigiiffiusumik ilinniartitsiffiusumillu pilersitsitsinissaq, tamannalu allaffissornikkut inuttakitsuni ajornakusoortorujussuusinnaalluni. Maannakkut periuseq innuttaasunik suliffeqarfinnillu assigiiaartumik oqaloqateqartarnermik qulakkeerrinnittuavoq suliasanillu pingaarnersiuneq salliutinneqarluni. Assigiimmik sullissinissaq inatsisitigut tunngaveqartumik malitassaavoq.

Aappaattut kommunit aningaasaqarnerat nanertorneqalissaaq aningaasat annaasaqaatit naleerutsinneqartarneranni kiisalu allaffissornerup annertunerulerneratigut. Akileraartarnermut Aqutsisoqar-

fiup akiitsunik akiliisitsiniartarneq akisussaaffigilermagu kommunit akileraarutitut akiitsunut annaasaannut naleerutsitsisarneq aamma Namminersorlutik Oqartussaniit akisussaaffik tiguaat.

Pingajuattut ukioq kingulleq oqartussani ataatsimoorussamik qarasaasiatigut systemi Prisme atuu-tilertipparput, tassani kommunit Namminersorlutillu Oqartussat pisassaat innuttaasullu akiliutaat nalunaarsorneqartarput. Oqartussat ataatsimoortumik systemeqarnerat kommunit Namminersorlutillu Oqartussat, aamma innuttaasuniit akiligassaqarfiusut allat akornanni qaninnerusumik suleqatigiinnissaannut pitsaasumik tunngavissiivoq. Aqutsisoqarfiup inissisimaffiani aamma allaffissor-nikkut allannguuteqartoqassappat kommunini ingerlatsivinnik nutaanik pilersitsinissamut aamma systemit tunuliaqutaaniittut ineriartorteqqinnissaannut aningaasat pisariaqartinneqassapput. Tamanna akisullunilu pisariussaaq.

Tamassumani tunngavilersuut pingaarnerpaaq tikikkunarparput. Akiitsunik akiliisitsiniartarnermut akisussaaffik Namminersorlutik Oqartussat kommunillu akornanni uteqattaartussanngorlugu inis-sinneqassanngilaq. Ullumikkut akiliisitsiniartarnermik suliaqartut innuttaasut inuunermi inissisimaffii nalunnngereerpaat. Sulinermi eqqissisimatinneqarnissartik ujartorpaat. Akiliisitsiniartarnermi oqartussat ataatsimoortumik akiliisitsiniartarneranni timitaliinissaq ujartorpaat, taannalu aqcutigalugu innuttaasut kommunillu akornanni attaveqarnermut tunngaviliinissaa ujartorlugu. Allaffissornerup iluani suliasap pitsanngorsarnissaanut eqqissisimatinneqarusupput. Sulisut eqqissisimatinneqarpata sinaakkuserneqarunillu innuttaasut inissisimaffii isiginiarneqalernissaannut isumaginninnikkullu isiginneriaatsit tappiiffigineqarnissaannut periarfissat annertunerulissapput, tamannalu innuttaasut akiitsuernissaannut innuttaasunut aqcutissiuisinnaavoq.

Oqallinnissaq tikitsinnagu siunnersuuteqartup taasaa Ilanngaasivik tikilaarusuppara. Ullumikkut oqallinneq pitsaasumik tunngaveqarluni ingerlanneqarsinnaaqullugu oqaatigissavara innuttaasut tamarmik aamma siunissami Eqqartuussisarnermut Inatsimmi § 618, imm. 1 aqcutigalugu illersorneqarmata. Innuttaasut aningaasaataat ineqarnerminnut inuuniarnerannullu naammattut tamassumunngalu pisariaqartitaat arsaarinnissutaasinnaanginnerannik tamanna isuma-qarpoq. Innuttaasut Ilanngaasivimmit sunnigaasut tassaapput innuttaasut ullumikkut aningaa-saatillit, kisianni pisortanut piffissaq eqqorlugu akiligassaminnik akiliineq ajortut. Naalakkersui-suniit naapertuulluannngitsutut isigineqanngilaq tamatta piffissaq eqqorlugu akiliisassagutta.

Taamatut oqaaseqarlutik Naalakkersuisut Inatsisartuni pissanganartumik oqallinnissamut qilanaar-put.